

**MESYUARAT PERTAMA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
17 APRIL 2020**

PERKARA : 5(B)(XVII)19

**SOALAN BERTULIS OLEH AHLI KAWASAN PERMATANG
BERANGAN
YB. NOR HAFIZAH BINTI OTHMAN**

19. Program Sosio-Ekonomi untuk Belia dan Wanita:

- (a) Senaraikan perancangan Kerajaan Negeri dalam menangani permasalahan sosio-ekonomi belia dan wanita?
- (b) Apakah rancangan/aktiviti pertambahan ekonomi untuk membantu meningkatkan pendapatan belia dan wanita?
- (c) Adakah Kerajaan Negeri menyediakan dana khas/elaun melalui Jabatan/Agensi tertentu kepada belia dan wanita yang menjalani kursus/latihan kemahiran ekonomi? Senaraikan.

**YB. CHONG ENG
MENJAWAB BAGI PIHAK Y.A.B. KETUA MENTERI**

19. (a) Kerajaan Negeri telah melaksanakan beberapa perancangan untuk menangani permasalahan sosio ekonomi di kalangan belia dan wanita seperti berikut:
- (i) Kerajaan Negeri telah melancarkan Dasar Keterangkuman Gender di Pulau Pinang pada 7 Mac 2019. Pelaksanaan dasar ini melibatkan usaha untuk meningkatkan kesedaran mengenai perspektif keterangkuman kepada penjawat awam dan komuniti dalam jangka masa panjang. Pemahaman mengenai keterangkuman dan keperluan kelompok

berbeza dapat membantu menangani permasalahan sosio ekonomi;

- (ii) Kerajaan Negeri memberikan bantuan bagi menggalakkan keusahawanan dalam kalangan golongan belia dan wanita di Pulau Pinang;
 - (iii) Kerajaan Negeri melaksanakan program bagi mengurangkan jurang antara kemahiran sedia ada belia dan wanita dengan keperluan industri. Selain itu, Kerajaan Negeri juga membantu belia dan wanita untuk pepadanan jawatan bersesuaian berdasarkan keperluan industri;
 - (iv) Kerajaan Negeri mempelbagaikan pelaburan dalam usaha untuk meningkatkan peluang perkerjaan di Pulau Pinang; dan
 - (v) Kerajaan Negeri berusaha untuk menyediakan modal insan yang berkemahiran tinggi untuk menghadapi Revolusi Industri 4.0 yang dijangka akan mempengaruhi perkembangan ekonomi dunia.
- (b) Antara rancangan Kerajaan Negeri bagi peningkatan ekonomi untuk menambah pendapatan belia dan wanita adalah seperti berikut:
- (i) Bekerjasama dengan agensi-agensi lain melalui InvestPenang untuk meneruskan usaha mempromosi dan menarik pelaburan, sama ada pelabur baharu ataupun pelabur sedia ada, di samping membantu pembangunan industri kecil dan sederhana (IKS) tempatan. Usaha ini akan mewujudkan lebih banyak peluang pekerjaan di Pulau Pinang;
 - (ii) Mempelbagaikan pelaburan dalam sektor *Global Business Services* (GBS) supaya peluang pekerjaan dapat ditingkatkan dalam bidang kewangan, teknologi maklumat (IT), seni kreatif, perisian dan sumber manusia selain daripada sektor pembuatan, pendidikan dan pelancongan perubatan (*medical tourism*);

- (iii) Kerajaan Negeri melalui Perbadanan Pembangunan Pulau Pinang (PDC) melaksanakan Skim Pinjaman Harapan untuk golongan usahawan bagi mengembangkan modal perniagaan. Selain itu, Kerajaan Negeri juga memperkenalkan Tabung Usahawan Tani (TUT) bagi mendorong golongan belia untuk menjadikan sektor industri asas tani sebagai kerjaya;
 - (iv) Kerajaan Negeri telah menubuhkan Tech Dome Penang, Penang STEM Sdn. Bhd. dan Penang Science Cluster dalam usaha untuk menyediakan modal insan yang berkemahiran tinggi di Pulau Pinang; dan
 - (v) Kerajaan Negeri melalui Pusat CAT (*Penang Career Assistance and Talent Centre*) untuk membantu golongan belia dan wanita menjalankan pepadanan jawatan yang bersesuaian dengan industri.
- (c) Kerajaan Negeri hanya menyediakan kursus atau latihan kemahiran ekonomi untuk belia dan wanita. Buat masa ini, Kerajaan Negeri tidak menyediakan dana khas atau elaun melalui jabatan atau agensi kepada belia dan wanita yang menjalani latihan kemahiran ekonomi.